

皇朝文鑑

十二

皇朝文鑑卷第三十五

制

封韓琦儀國公制

王



除韓琦門下侍郎兼兵部尚書進封衛國公制

王

珪

除曾公亮門下侍郎兼吏部尚書進封英國公

王

珪

除文彦博樞密使賜功臣制

王

珪

除富弼判河南府制

王

珪

除文彦博守司空依前樞密使制

王

珪

除陳升之禮部少書同中書門下平章事集賢

王

珪

除程戡安武軍節度使再判延州制

王

珪

除曹佺保平軍節度使加食邑實封制

王

珪

除李璋殿前都副指揮使武康軍節度使制

王

珪

除郝質殿前都指揮使安武軍節度使制

王

珪

除皇伯祖承亮檢校工部尚書榮國公感德軍

節度使制

王

珪

賢妃苗氏進封德妃制

王

珪

皇長子德寧公主進封徐國公主

王

珪

除富弼尚書左僕射充觀文殿大學士集禧觀
使制 呂 公著

除富弼依前尚書左僕射兼門下侍郎同中書
門下平章事昭文館大學士制 鄭 儼

邢氏進號賢妃制 孫 洙

陳升之起復同中書門下平章事集賢殿大學
士制 元 絳

除皇弟頴保靜軍節度使進封嘉王制 元 絳

除韓琦京兆尹再任判大名府 元 絳

除韓絳觀文殿大學士知詳州制 元 絳

除燕達武康軍節度使充殿前副都指揮使制 李 清臣

除韓琦依前同中書門下平章事進封儀國公
加食邑實封制 王 珪

朕按奉高之儀思承上帝之福詠我將之什知配文王
之功諏及季秋之良盡志孝饗之事應一郊之定卜躬
三歲之宗祈于時陳物采於國中接神明於堂上對玉
溫潔柔粢盛令芳靈光燭於大庭休氣蒙于重宇疇相丕
祀於顯元臣肆膺拜胙之釐首布告廷之命具官韓琦
命世發德佐王矢謀財萬化於物宜熙百工於帝載已
任沈機之斷力陳遠馭之圖若歲為霖可以濟天下之
旱如易占筮可以判天下之疑責大而智愈深事昭而

情猶勉廼先使之詔靡物備而不嚴維自昔之文或禮
闕而不講使朕得褻六天之對歎七廟之靈輯于昭曠
之儀顧匪烈文之輔茲庸錫之名壤建爾上公寢廣奉
田之腴復勳真食之賦汝爲汝聽汝勞汝嘉於戲在
福不敢康蓋天有難忱之命於德如弗及蓋民無常懷
之心雖朝廷之甚休益君臣之相勅宜與盛治允答靈
歆

除韓琦門下侍郎兼兵部尚書依前同中書門

下平章事進封衛國公加食邑實封制

王珪

王者紹景炎之序履皇極之尊永推置器之艱屬在佐
王之略睠夫上宰翼我先朝適及委裘之辰肆于奉
瑁之始定策宗社貫心神明逮躬丕務之咨敢後元勳

文三十一

之獎首專邦渙誕告朝倫具官韓琦器博而適時道闕
而濟物稟星辰之精粹會日月之休明歷宣外勞更倚
二柄蹈夷險之一節寄安危之大機仰文考之知賢絕
時髦而登用維召公之託嘗聞顧命之言維漢相之謀
終應大橫之兆蓋懷先見者識之邃決至慮者材之英
天扶不拔之基神贊非常之輔是用進文昌之卿序正
黃闈之台符隆以封爵之文益之戶田之數以蕃爾寵
以懋爾庸於戲天視靡私居飭有邦之畏民公曷戴一
歸厥后之仁念先猷之弗敢康頌成業之不可恃益經
茂烈永佐昌圖

除曾公亮門下侍郎兼吏部尚書依前同中書

門下平章事進封英國公加食邑實封功臣

制

王珪

大火基宋寶開 五聖之符六龍乘乾遂繼中天之運
乃睠近弼荐更 三朝元勳冠於百僚利澤施千萬世
載蠲穀旦敢告治廷具官曾公亮學通天地之微謀合
聖賢之舉包剛柔於九德固夷險之一心蚤膺 皇祖
之求爰履公台之位有臯夔之論能變堯民於時雍有
丙魏之聲不改漢家之故事肆我 文考遺予冲人咨
顧命之老臣輔初政于天下重宣至策終仰丕成進首
中臺之班往顯東省之務既疏榮於公社益躡數於爰
田功之所加寵不敢後於戲恐德弗類念高宗之未言
俾民不迷繫尹氏之素力共祗天監永協邦休

除文彥博樞密使賜功臣制

王

珪

天極環樞上通帝位之紀神兵會府內嚴師律之謀朕
方垂講丕平進經常武雖天下無事思備禦之不敢忘
蓋王者有征視安危之不敢忽適登髦傑資以輔予具
官文彥博器閎而深材敏以濟早賁賢人之業實膺
聖考之知以忠孝之名形家國之盛節以文武之略輯
將相之大猷肆纂命於皇圖廼離憂於喪紀迨終哀戚
甫見儀刑屬疆事之方興煩師旄之載舉折衝境外方
將出澹於王靈收畫帳中曷若坐圖於廟勝宜長機廷
之務宜符巖石之瞻於戲過餌北戎未厭貪驕之志再
盟西夏猶苞狂忽之圖終佇奇勳用恢遠馭

除文彥博守司空依前樞密使加食邑實封制

王

珪

朕若稽先王維御羣品左謀金鉉之老以經治於廟堂
右屬鴻樞之良以定策於帷幄厥有成績可勿褒乎具
官文彥博風力肅明器資恢傑臨至劇有轉圜之易定

大謀如執玉之堅違事神文之朝已緝熙於鼎路追言
聖考之遇又密勿於機廷肆涼昧之不承會精神於羣
慮雖兵民之異本亦文武之交脩未隆贊冊之恩曷懋
圖庸之舉其保宏父允釐華陽顧豈明分之私終繫老
成之助於戲有若閔天尚迪文王之彝罔俾阿衡以專
商家之美往篤爾烈永承于休

除富弼依前同中書門下平章事充武寧軍節

度使判河南府兼西京留守司事仍賜功臣

制

王

珪

三台處中以裁萬物之化四嶽總外以牧黎民之蕃如
山河之經九州如股肱之衛一躰出處之際朕無間然
具官富弼復貫有元蹈中邦勉學幾聖而獨至識造物
之未形貴名起於三朝盛德儀于百辟鄉召從於列
屏俾進翊於冢司為日尚新何恙靡已未及經邦之務
遽陳避位之辭詔雖屢而莫回章甫卻而復至朕憮然
自念嗟莫能勝既閔勞於政幾其聽遂於私佚建彼徐
節以殿東郊守茲洛符以保西宅仍位鴻鈞之貴尚優
黃髮之行於戲不處成功專老氏榮名之畏其旋元吉
要義經履道之終雖弗從於吾游亦自保於而福

除陳升之禮部尚書同中書門下平章事集賢

殿大學士加食邑實封制

王

珪

色齊三階則風雨不失其序聖如二帝然股肱亦繫其
人朕上撫乾緯之明下慎國鈞之寄方審求於賢輔俾
參穆於政途若時登庸蓋出定命具官陳升之識幾聖
蘊謀仁皇猷學積于原而心彌充智酬于變而力彌裕
早膺 仁祖之擢以遺 文考之知肆予冲人克即大

任問甲兵則有鎮撫四夷之略問衣食則有運理羣物之心朕方稽百王之謨經一世之績宜進躡於賢序以延登於宰廷夫知歷選之既難躡委用之寄重則義莫得以愛已道惟專於澤民豈特無疆之休亦有無窮之問於戲論金穀之計其歸內史之司作霖雨之滋是應高宗之命往熙帝載庸代天工

除程戡安武軍節度使加食邑實封再判延州

制

王

珪

周禮命卿司馬掌國征之事漢儀遣帥將軍額闡制之權自非謀經帷幄之咨名厭疆垂之難則何以稽圖而受社賜律以臨戎茲疇舊政之良式協師虞之望具官程戡躡忠忱之度蹈夷雅之風進搢藝文之華仕階名秩之膺方先朝之籲峻更三府之告猷左右六年夙夜一節肆纂休於皇緒適留寄於邊衝空深寤寐之思且重安危之倚上金城之方略猶知充國之彊習闕里之絃歌還見祭遵之佚就付兩河之節存綏西土之封既衍食於爰田復倍輸於真戶風聲雖舊寵數維新於戲制夷狄者備不可遽忘守方隅者執不可數易蓋威素申則敵情熱信久著則士心懷尚堅壯圖往服渥命

除曹佺保平軍節度使加食邑實封制

王

珪

朕承景歷之昌嗣不基之重渙敷大命胥澤羣元咨我方兵之良時維屏翰之憲念宣勞於劇委稽渙獎於陟文卜以剛辰告于列序具官曹佺躡神韻遠氣勁謀沉傳紀上之神書託兩京之肺附顯允祖烈實為宗臣於皇母儀古后生帝濟忠純於奕世復誦劫而保躬營

其武之威燄威元戎之貴助守文之德武繁外戚之賢
進導徽猷象懸台路肆績膺於聖統方倚輔於英藩載
疏冢社之崇言視上公之峻隆階表貴衍食勳封卒
為寵休以時黜近於戲詔爵祿之柄天官以馭夫羣臣
錫車馬之儀大雅以褒夫元舅蓋績美則報之厚愛隆
則禮亦蕃往懋淑聲永綏多福

除李璋殿前副都指揮使武康軍節度使制

王珪

羽林神兵北環天衛之象黃帝李法中嚴邦律之師
國家鬯武節於四遐提禁屯於千列進總凝嚴之護歷
圖勁傑之資稽衆得人告廷孚命具官李璋氣沈而果
事性裕而知方厲許國之單忠達治兵之善志緒服高
華之望名推親信之良朕念長樂之慈愴不及養顧渭
陽之族聞蓋多賢自擢領於戎昭已積遷於留寄屬巖
除之缺帥宜齋鉞之命才六壽縣啓途既襲重侯之貴萬
兵留帳方資綏帶之安雖其素勞不曰異寵於戲執干
戈則有社稷之衛常慎於假人聽鼓鼙則有將帥之思
實深於注意維蹈忠義者急於報主蓋喜功名者要之
逢時勉規壯圖尚率明訓

除郝質殿前都指揮使安武軍節度使加勳食

邑實封制

王珪

國家統御之勢大維持之業隆外倚四巖藩翰之臣中
謀萬夫貔虎之帥故奉委裘而羣情固聞受瑁而三靈
趨肇臨發政之辰首下放朝之命具位郝質性資莊厚
氣略沉雄通玉帳之善經體金行之正氣自昔先帝
知為勁臣因其勤舊之名立在親信之地會綴衣之陳

庸提衛甲之環宮曾無夜警之譁自得剛牙之重紹帝
符於景祚渙邦號於前彝視秩冠于文昌徒節臨乎安
武加以總正使範封并旌巖陞之勞以表師千之
寵於戲天之辭壘象在羽林王之爪牙職于圻父蓋地
嚴則必資拱扈之力帥眾則猶賴訓齊之方往堅壯圖
思荅殊遇

除皇伯祖承亮檢校工部尚書榮國公感德軍

節度使加食邑實封制

王

珪

蓋聞周興建土遂膺年歷之長秦失罷侯靡復藩維之
援此國家所以監用往制封崇茂姻以夾輔於王家以
懷柔於天下肆膺皇緒渙舉不彝皇伯祖具官承亮躬
耆德之英披忠訓之厚曾無車服珍寶之玩固有詩書
道術之明稽帝堯之仁疇先骨肉之愛頌秦悼之後不
減祖宗之蕃自居留務之榮浸廣皇天之譽按戊午
之新澤合南陽之近親華鄂承跼旌樂和於列邸犬牙
交壤寄雄峻於師旄旣行爰田之封又陪真食之入助
建大統圖絜老成於戲積厚者流長雖本神明之祚德
隆者爵重况如宗族之賢均獲多祥勉欽溥命

賢妃苗氏進封德妃制

王

制

帝居六宮之制率輔於皇猷天極四星之華實禪於壺
事朕嗣膺邦統思穆人倫褻臨妃掖之英化始宸闈之
順命龜薦日班綺布朝賢妃苗氏性資惠明儀度間肅
居蹈箴圖之戒動循珩珮之飾八月良家早被後庭之
選平陽別館爰開貴主之祥而能進遠驕華舉思謙畏
榆衣表祀上以贊於后勤彤史流徽下以儀于嬪則庸
之茂益隆位序之崇名以副勞義非能典於戲

坐而論婦之禮蓋視三公之尊內有進賢之心始安君子之佐維正道然後式于外顧私謁不可黷於中往服訓辭永綏寵命

皇長女德寧公主進封徐國公主制

王

珪

周美王姬之華下王后之一等漢推帝女之寵主同姓之諸公故至愛形而九族歡內則正而四海順乃睠公宮之懿適從世闕之速宜合丕彝用孚羣德皇長女德寧公主僊支襲慶邦媛流徽鍾天性之深慈躬女圖之茂矩幼而勤組訓之習亦既飭婦事之脩長則有室家之歸將以經人倫之始維衿鞶之有命維車馬之有行卜仲冬之嘉辰社大易之元吉瓊華在著已戒齊風之醕粉水疏園莫如徐國之樂侈燕謀於皇裔充美化於民間顯錫徽章大旌柔度於戲前監唐家之制盥饋不可以闕供近稽仁廟之撫冠服仍從於少損蓋肅雍者賢之檢儉約者古之師其體至懷自膺長譽

除富弼尚書左僕射充觀文殿大學士集禧觀

使制

呂

公著

聖王賦祿所以崇德而勸勞賢者辭隆所以激貪而厲俗眷我外相惟時宗工願還重紱之榮蓋露累章之請既重違於悃悞宜特示於褒優載揆剛辰式敷渙號推誠德保崇仁忠亮佐運翊戴功臣武寧軍節度徐州管內觀察處置等使開府儀同三司檢校太師同中書門下平章事行徐州大都督府長史上柱國鄭國公富弼體資忠亮識蘊淵閎炳嶽瀆之粹靈挺陳薨之厚器光輔仁祖蔚為文武之師迨事先皇寶總機衡之要

引疾遽辭於大柄均勞式毀於近邦未移巖石之瞻併
及洪河之潤肆予續紹尤渴儀刑雖體力之未平顧風
猷之克壯而乃過持冲守深遜寵名諭言已周誠意彌
確朕惟安危所寄雖賴老成之人損益有規宜伸大雅
之志俾進班於左揆聽復節於中臺仍總領於殊庭竝
論思於秘殿用彰寵數蓋示眷懷於戲進止不膠共扶
於名義幽明有相終畀於壽臧風於四方時汝之德

除富弼依前尚書左僕射兼門下侍郎同中書

門下平章事昭文館大學士兼譯經潤文使

鄭國公制

鄭 儼

秉錄膺圖將繼配天之大業銓時論道必資名世之元
臣以言乎體貌則舊德之英以言乎望實則羣材之表
爰立作相宜莫如公丕昭寵數之殊孚告治朝之聽具

文宣三十五

官富弼智資大雅德懋碩膚學足以造聖人之微幾足

以通天下之變繇賢科之得雋摠遠業以奏功在 仁

祖時則首冠廟堂有弼諧九德之美在 英考世則再

登樞府有折衝萬里之謀庶績已熙太平將洽屬留侯

之多病容留度以為藩愷悌所宜神明自復方王家之

不造固賢者之有為昔居畎畝而志猶在於愛君今處

朝廷而義豈忘於憂國是用召從方守進拜元台仍左

揆之舊班兼東臺之茂秩爰田衍賦盟府易勳茲實異

恩庸昭注意於戲上理乎天工則日月星長以之順下

遂乎物宜則山川草木以之蕃近則諸夏仰德以承流

遠則四夷傾風以待命凡予欲治惟爾責成勉盡嘉猷

用光丕訓

邢氏進號賢妃制

孫 洙

王宮六樂崇建婦官天極四星垂著妃象所以協宣陰
教助穆宣闡矧視秩於上公必敷求於淑哲朕厲精于
治選納尤希嬪嬙靡充位號多闕弘延登於邦媛用播
告於路朝婉儀邢氏德稱後庭體台法相居念保阿之
訓動循環佩之音授弓矢於媒祠以熊羆於吉夢是宜
詳案舊典升備列妃進參榆狄之華益昭彤管之煒坐
論婦禮正始國風品冠六儀名超九御於戲周南之詠
卷耳無險詖私謁之心齊詩之美雞鳴有警戒相成之
道寵靈烜赫禮秩優隆匪時婉嫕之良疇若褒嘉之命
佐后內治爾尚勉哉

陳升之起復同中書門下平章事集賢殿大學

士制

元

絳

閔子經而服政先賢稱得事君之宜晉侯墨而臨戎前
志謂達變禮之用矧子承弼奄溝閔難久虛席以思賢
宜敷朝而渙號具官陳升之蘊渾厚之量挺高明之材
體備四氣之至和智通萬方之遠畷發紆一德感會
三朝經武斗樞之庭則王靈震疊贊元鼎鉉之府則邦
治協寧端正百度之原章明九敘之極向鍾家庖越解
政均稽之師言厥有前憲相焉奪服其惟詔使之從趙
喜離憂未始宰司之去盍來復於台路以大熙於天工
於戲繼恩從權自昔弗踰於國制移孝扶義維時尚久
於王家勉一廼心無替朕命

除皇弟顥保信保靜軍節度使進封嘉王制

元

絳

史謂建大宗之封如安盤石之固詩美得同氣之助若
敷常棣之華朕紹五聖之休昭九族之序固已倚天

屬於本根之重措公姓於翰幹之彊況於至親宜有顯冊播告羣位厥維太公具官顯燕翼發祥溫恭迪哲英姿茂而玉裕盛氣粹而陽休講藝服儒多推道術之對好禮樂善雅有智思之文鼎稽立愛之經隻衍建侯之寵有華上公之袞有倣元戎之旂賢儀演明師論矣穆是用端筴以審繇按圖而定名表爲真土奄受樂國畫岷峨之野陪以受田易肥渙之麾加之兩組循典常而出閣謹著定以奉朝列第環宮彌聳開元之觀側門通禁永承長樂之顏備飭愛懷布草慶譽於戲展親以誠信我則友于天倫秉德以輔陪爾則蕃於王室思長富貴之守懋底忠孝之成往其欽哉以對猷訓

除韓琦京兆尹再任判大名府制

元

絳

分陝稱伯召南當公職之尊啓魏就封畢萬得國名之大況吾元老爲世宗臣久倚師垣之嚴宜遷尹節之寵飭宣典策勇告縉紳具官韓琦道醇而深器遠而博渾渾忠孝之業憲憲文武之姿感通 仁朝亮衆采於台極翼戴 英考捧大明於天衢肆朕纘圖厥初謀落燮諧四氣之序熙輯百官之成登昭公槐奄涖國社鎮定大事安如九鼎之安承寧諸侯端若元龜之信歲勤再閱師律既和重念郊圻之雄旁據河山之險徒得君重以宣上靈就更西雍之旄留主北門之鑰載 敷 爰賦并賞於封於戲漢咨陳平安危注於上意唐用裴度輕重繫乎厥身維迺純誠無愧前列懋服休命往其欽哉除韓絳觀文殿大學士知許州制

元

絳

國家登延弼疑內以起功於庶事圖畀藩翰外以發政於四方閔勞申恩倚重均體肆專不號庸詎廣朝具官韓絳躬莊厚之姿函忠忱之度濟世美以特立告良猷而具臧婁陪國均實輔台德嚮自保釐之寄再膺翼亮之姿高平師師總脩衆職之果公孫斤斤參聽百官之成久宣于勤間懇以疾確辭幾務之劇祈即燕申之休感于朕聰姑徇爾欲宜還宰鼓往建州麾陟春官常伯之尊兼禁殿隆儒之冠載更切號增衍并封於戲乃眷臣鄰雖爾身之在外不忘壽考豈茲心之謂遐其服寵章以將福履

除燕達武康軍節度使充殿前副都指揮使勳

封如故制

李

清臣

祈父之官司王介士上將之任爲國虎臣予得智勇之材俾共左右之位誕敷休命播告大廷具位燕達拔迹戎行厲躬武節深明分數之守兼識變通之權捍外侮於西陲佐濯征於南服嘗鼓僂趨阨以奮率丞徒能降城艾旗以盪定逋寇夙付簡稽之籍進督號噉之軍人知訓齊衆不諱教是嚴師律擢苞殿巖越從廉車遂物齎鉞於戲惟威愛足以臨下惟忠義可以報君勤懋乃心欽迪朕意

皇朝文鑑卷第三十六

制

除皇伯宗暉淮康軍節度使特封濮國公制

鄧 潤甫

立皇太子制

鄧 潤甫

封荆王頽太傅武寧鎮海軍節度使制

鄧 潤甫

除皇弟德武成軍節度使祁國公制

鄧 潤甫

除司馬光左僕射制

鄧 潤甫

除文彥博平章軍國重事制

鄧 潤甫

除呂公著右僕射制

鄧 潤甫

除呂公著守司空同平章軍國事制

二

蘇 軾

除呂大防守尚書左僕射制

蘇 軾

除范純仁尚書右僕射制

蘇 軾

除苗授武泰軍節度使充殿前副都指揮使制

蘇 軾

除皇伯祖宗晟特遣復制

蘇 軾

西蕃邈川首領阿里骨加食邑制

蘇 頌

劉昌祚加恩制

蘇 轍

除文彥博太師河東節度使致仕制

蘇 轍

除文彥博司徒判河南制

曾 布

除范純仁觀文殿大學士知穎昌府制

立皇后孟氏制

曾 布

徐王改封冀王制

梁 燾 范 祖禹

除向宗良檢校司空充體泉觀使昭信軍節度使制

范 祖禹

除皇弟蔡王似保平鎮安軍節度使制

范 祖禹

除曾布右僕射制

范 祖禹

復元祐皇后制

蔡 京

蔡京降太子少保致仕制

張 閣

除皇伯宗暉依前檢校右散騎常侍充淮康軍

節度使特封濮國公加食邑今實封餘如故

制

鄧 潤甫

禦侮尚親先王未之或改折衝授鉞天下所以久安眷

惟尊屬之賢蚤有皇支之譽其敷稟律以告治庭皇伯

邕州管內觀察使金紫光祿大夫檢校右散騎常侍持

節邕州諸軍事邕州刺史兼御史大夫上柱國天水郡

開國公宗暉器宇闕深履尚方重詩書自樂莫漢邸宗

英之聞孝友夙成有濮園天性之愛爵隆而無驕貴之

累祿富而懷約己之風陞拜康車之崇益增公族之重

是用疇庸躡等辨域展圖付名部之整軍奉賢王之明

祀維衮及繡視上公之儀錫山與田壯元戎之寄兼陪

真賦庸示寵章於戲親親主恩非異數無以昭其意繼

繼在德惟馴嗣可以孚于休更恢遠猷以稱茂渥

立皇太子制

鄧 潤甫

建儲非以私親蓋明萬世之統主器莫若長子茲本百

王之謀朕荷天地之況臨席祖宗之詒燕廼睠上嗣之
貴蚤應前星之祥宜告大廷誕揚丕號皇子彰武軍節
度使延州管內觀察處置等使檢校太尉開府儀同三
司持節都督延州諸軍事延州刺史上柱國延安郡王
勳宗溫文日就膺智夙成回馳道之車能止班輪之驚
辨南陽之牘允符東海之休自䟽錫於王封益光華於
德望勝衣視膳溢然孝友之姿好禮受經不煩師傅之
誨是用歷盛陽之嘉日舉 列聖之大章肇正青宮肆
放顯冊以協離明之吉以係天下之心於戲立愛始親
商以成千歲之業建嗣必子漢以撫四海之民斯為永
圖往膺徽典

封荆王顥太傅武寧鎮海節度使制

鄧 潤甫

朕罹國大憂紹天明命黃陵玉座永懷復土之深清廟
朱紘序陟寧神之禮哀恫罔極感慕從中念宗藩尊屬
之賢有 文考同生之愛圖功甚茂送往良勤敷告大
廷肆敘贊冊皇叔武昌武安等軍節度鄂州潭州管內
觀察處置等使守太保開府儀同三司持節都督鄂州
潭州諸軍事鄂州潭州刺史上柱國荆王賜贊拜不名
顥身端而行治識遠而量夷地則茂親時惟明德翼戴
王室雅有二南之風表儀宗枝獨包兩獻之學協策廟
社乃心朝廷昨朕承祧疇勞錫命屬緝 裕陵之禮遠
護靈駕之行事有感懷義當襲異是用進以官班之等
寵之帝傅之崇出節徐郊建麾青社以應采菽來朝之
賜以慰棠棣孔懷之情於戲詩美大宗是為四國之翰
禮尊叔父固曰一人之嘉往服龍光益膺福祉

除皇弟德武成軍節度使祁國公制

鄧 潤甫

朕奉承燕謀獲紹大統永懷 先烈曷勝哀疚之情眷
顧同生宜厚褒封之典孚我明命揚于治廷皇弟德武
疑得於自然溫文見於異稟挾天材之美質應帝武之
嘉祥未臨射矢之良遽起號弓之慕踰年於此錫壤惟
時矧周人尚親尤重本支之務漢廷左戚亦隆襁褓之
封規裁半楚之疆載徹濱河之域苴茅制社授鉞毀邦
用建上公尹茲北國策勳加等衍邑實租於戲西望
裕陵敢忘幼子之愛東朝長信進預諸孫之游往服恩
輝益延壽祉

除司馬光左僕射制

鄧 潤甫

帥羣臣宿道而嚮方在慎取相佐王者修政而美國莫
若求人顧惟眇躬獲嗣大統儲思業業不敢忘六聖之
休注意賢賢將以總萬方之治褒進上宰敷告外庭正
議大夫守門下侍郎司馬光受材高明履道醇固智足
以任天下之重學足以知先王之言逮事厚陵編儀侍
從之列被遇 又考擢總樞機之繁有大臣特立之風
蹈君子難進之節方予訪落之始起應秉均之求調娛
萬幾必先教化之意辨察百職不失禮義之中是用諮
諏僉言褒加異數越陞左揆之路兼峻東臺之班申衍
爰田陪 敦 真食於戲上寅亮於天心則陰陽風雨以
之順下遂字乎物理則山川草木以之寧內阜安於兆
民外鎮撫於四裔蓋輔相者為之基杖而老成者重於
典刑勉行所聞以底極治

除文彥博平章軍國重事制

鄧 潤甫

師傳道之教訓先王所以迪厥官老成重以典刑天下所以資其智廼曠舊德時謂元勳謀合祖宗之心名載鼎彝之器申放贊策播告外朝河東節度管內觀察處置等使守太師開府儀同三司太原尹致仕上柱國潞國公文彥博 博大而清明方嚴而信厚出則秉乎旄鉞入則總我鈞衡文武兼備其才夷險能致其力畢公之弼四世三紀于茲傳說之總百官萬邦其又爵隆無富溢之累名遂有身退之榮神明相其壽康人心想其風采是用還之論道倚以經邦以帝者之師臣謀議廟堂之上以天下之大老制馭夷狄之情庶幾有為底于極治陪 多多并申衍真封於戲呂望惟賢起佐文王之治周公已老留為孺子之師矧我耆英無愧前哲往宣一德用格多盤

除呂公著右僕射制

鄧潤甫

國莫難於置相君莫重於知人堯舜之隆蓋以疇咨而熙載商周之盛至以夢卜而求賢天降割于我家予未堪於多難思用耆德交秉政鈞其敷寵章以詔羣辟金紫光祿大夫門下侍郎上柱國東平郡開國公呂公著行應儀表學通本原忠義得於天資功名自其世美被遇 先帝嘗入贊於樞庭暨予冲人遂同寅於政路傳經意以謀國體推上澤以紓民心敘收雋賢補直法度方重不倚雅有大臣之風調娛適中遂通當時之務是用陞之右揆委以繁機申衍爰田陪 多真賦爾則代天而理物予則羞者以惟君於戲丞相之位未嘗無其人儒者之効久不白於世孟軻言無有者數百歲揚雄稱自得者二三臣蓋迪遠業者其功難循近迹者其力

易勉行所學以底不平

除呂公著守司空同平章軍國事制

蘇軾

仁莫大於求舊智莫良於用衆既得天下之大老彼將安歸以至國人皆曰賢夫然後用今朕一舉仁智在焉宜告治朝以孚大號金紫光祿大夫守尚書右僕射兼中書侍郎上柱國東平郡開國公呂公著訂謨經遠精識造微非堯舜不談昔聞其語以社稷爲悅今見其心三年有成百揆時敘維乃烈考相于昭陵蓋清淨以寧民亦勞謙而得士凡我儀刑之老多其賓客之餘在武丁時雖莫追於前列作召公考固無易於象賢而乃屢貢封章力求退避朕重失此三益之友而閔勞以萬幾之煩是用遷平土之司釋文昌之任毋廢議論時遊廟堂於戲大事雖咨於房喬非如晦莫能果斷重德無逾於郭令而斐度亦寄安危罔俾斯人專美唐世

除呂大防太中大夫守尚書左僕射兼門下侍

郎制

蘇軾

朕聞天子有道其德不可得而名輔相有德其才不可得而見故漢之文景紀無可書之事唐之房杜傳無可載之勳當時安榮後世稱頌予欲清心而省事不求智名與勇功天維顯思將啓承平之運民亦勞止願聞休息之期眷予元臣咸有一德咨爾百辟明聽朕言中大夫守中書侍郎上柱國汲郡開國公賜紫金魚袋呂大防造道淳深受才宏毅果藝以達有孔門三子之風直大而方得坤爻六二之動久踐右闥蔚爲名臣宜陞左輔之崇兼綜東臺之務加賦進秩寵數益隆得位與時

憂責彌重於戲若古有訓無競維人崔公建中之風以
除吏八百而致裴垕元和之政以薦士三十而能惟公
乃心何遠之有

除范純仁太中大夫守尚書右僕射兼中書侍

郎制

蘇

軾

朕惟朝廷之盛衰常以輔相為輕重若根本疆國精神
折衝故薦為呂臣奉已而不在民則晉文無復憂色汲長
孺直諫而守死節則淮南為之寢謀朕思得其人付之
以政使天下聞風而心服則人主無為而日尊咨爾在
廷咸聽朕命中大夫同知樞密院事上柱國高平縣開
國伯賜紫金魚袋范純仁器遠任重才周識明進如孟
子之敬王退若蕭生之憂國朕覽觀 仁祖之遺迹永
懷慶曆之元臣強諫不忘喜臧孫之有後戎公是似命
召虎以來宣雖兵政之與聞疑遠猷之未究坐論西省
進貳文昌增秩益封兼隆異數於戲時難得而易失民
難安而易危予欲守在四夷以汝為偃兵之姚宋予欲
藏於百姓以汝為息民之蕭曹勉思古人以稱朕意

除苗授武泰州軍節度使充殿前副都指揮使

制

蘇

軾

出揔元戎作先聲於士氣入為環尹寓軍政於國容將
伸闡外之威以迪師中之吉咨于爾眾朕得其人侍衛
親軍步軍副都指揮使威武軍節度觀察留後持節福
州軍州事福州刺史上柱國濟南郡開國公苗授早以
異材見稱武略被服忠義有烈丈夫之風砥礪庶隅得
士君子之槩荐揚邊圉益著勞能拔自眾人既蒙 先
帝之遇遂拜大將無復一軍之驚祗危殿岩肅將齋鉞

予欲少長有禮而兵可用汝其夙夜在公而令必行於
戲愛克厥威罔功茲為深戒師衆以順為武古有成言
惟懋乃衷毋忘朕訓

除皇伯祖宗晟特起復制

蘇軾

曾閔之哀喪不貳事漢唐之舊禮有奪情矧予藩屏之
親實兼臣子之重雖閨門以恩掩義而公侯以國為家
伯臣司宗職不可曠要經服事古有成言非予爾私其
聽朕命皇伯祖彰化軍節度涇州管内觀察處置等使
檢校司空開府儀同三司持節涇州諸軍事涇州刺史
判大宗正事上柱國高密郡王宗晟天資純茂德履方
嚴襲餘慶於祖宗蹈格言於師保典司屬籍克有令
名郢客卒業於浮丘辟疆受知於先帝允鑿厥位無
愧昔人屬此閔凶纍然毀瘠嗟日月之逾邁重職業之
久虛宜復寵名式從權制於戲出居官次非王事不談
退適倚廬讀喪祭之禮則忠孝兩得人無間言功名益
隆親有顯譽勉服朕訓光昭前聞

西蕃邈川首領阿里骨加食邑制

蘇頌

祭有十倫之義施爵賞以為先福者百順之名本忠孝
之自出朕祗祓陽館崇嚴禰宮配神穹昊之尊流澤幅
員之廣嘉與卿士同茲慶休便蕃優渥之恩固無內外
之異告于朝案布乃言綸西蕃邈川首領河西軍節度
涼州管内觀察處置押蕃落等使金紫光祿大夫檢校
太保持節涼州諸軍事涼州刺史上柱國寧塞郡國公
阿里骨生有軼材少負偉略稟天地之義氣得秦函之
遺風奠塞外之封疆繼承列土擁河西之旄鉞坐護諸

羌長旌一方作我西屏屬九筵之講禮盛四海之駿奔
來獻其琛實相予祀是用加命王公之數視秩帝傳之
崇增井賦於爰田廣國租於真食於戲爾有時享歲貢
之恪史不絕書我有餒神觀政之方惠必及下既均承
於純嘏宜益厲於忠規往服訓言克享天祿

劉昌祚加恩制

蘇

轍

朕因路寢之正舉合宮之祠禮樂法商周之隆車服兼
漢唐之盛出款原廟還享上穹職貢充庭工師復位兵
衛如植旌旆不煩實惟有人以克成禮殿前副都指揮
使武康軍節度洋州管內觀察處置等使持節洋州諸
軍事洋州刺史上柱國彭城郡開國侯劉昌祚天姿鷲
勇惟本忠良結髮征羌號馬上之飛將授鉞臨塞皆關
中之要區方西鄙之須材會中軍之謀帥畀之旄節之
重付之貔虎之師歸閱浹旬旋聞輯睦逮此熙成之慶
賴其宿衛之勤既增封爵之崇仍加真食之厚於戲古
之明主立賞以待有功古之賢將有功而恥自列服予
霈澤之異勉爾勲名之思貴當益恭老當益壯

除文彥博太師河東節度使致仕制

蘇

轍

周公未嘗之魯老亦居豐留侯晚雖彊食終不任事蓋
委寄之重初無間然而止足之風所不敢廢惟我耆舊
歷事祖宗纘服之初復命以位雖師保之地優佚不
煩而立樊之心朝夕以請布告在位俾聞高風太師平
章軍國重事上柱國潞國公文彥博克孝而忠允文且
武其在師旅有方召之勲其在朝廷有崇璟之業士民
視其去就夷狄震其威名時更四朝躬蹈一節先皇

帝愍勞以事既許其歸越予訪落之年凜有涉淵之志起之既老待以仰成出入五年終始全德進而論道日聞典訓之言倚以折衝卒靖邊防之警委成功而不勲指莫景以求安動請屢聞誠心莫奪顧瞻間井近在洛師郭氏有永巷之嚴裴公有綠野之勝豈以簪綬之累久致形氣之勞貴極上公既無復加之爵秩分領全晉仍畀久還之節旄增廣舊封益衍真食殫盡人臣之寵歸從父老之游於戲音聲不遐尚有就問之禮几杖以俟復斯親祀之陪勿以進退之殊而廢謨猷之告式燕且譽俾壽而康

文彥博司徒判河南制

曾

布

秉國大均絕席廟堂之上經時常武運籌樽俎之間維吾老成多所更踐懇辭幾務往殿近藩敷告于廷進疇厥位推忠協謀崇仁同德經邦贊治守正保運亮節佐理功臣樞密使劔南西川節度管内觀察使處置橋道等使開府儀同三司守司空檢校太師兼侍中兼羣牧制置使行成都尹上柱國潞國公文彥博器質宏偉智謨靖深逮事 祖宗蚤登丞弼周旋左右當四海之具瞻密勿樞機寔萬邦之爲憲肆予纘御屬在倚毗深惟注意之勤勉徇均勞之請眷言耆舊宜所褒崇增秩上公衍封真賦光華故里揭全晉之旌旄偃息名城壯陪京之屏翰出入中外始終顯榮於戲進而論道經邦則必告嘉猷于后退而承流宣化則必下膏澤於民惟往欽哉尚多受祉

除范純仁觀文殿大學士知穎昌府制

曾

布

謀謨廟堂入則股肱於大政偃息藩翰出則師帥於一方維時宗工引疾辭位均逸近輔敷告大庭通議大夫守尚書左僕射兼中書侍郎上柱國廣平郡開國公范純仁端良稟於世資樂易成於天性有砥名厲行之志有面折廷爭之風越自 累朝變更華選暨冲人之嗣服適文母之仰成咨于臣鄰付以宥密一踐樞要再持國均朕恭己紹庭嚮明圖治緝熙緒業追遙先猷方有望於彌諧遽固辭於機務重違爾志姑即厥安增視秩之榮名進陪封之寵數式隆體貌何吝眷私於戲論道經邦常在倚毗之地承流宣化勿忘勵翼之心祇服朕言往共爾位

立皇后孟氏制

梁 燾

正家者義之先天下從而定矣大昏者禮之本聖王所以重焉朕繼體持盈側身思永方切基圖之固敢娛宮室之安太母以萬世為心命度宗事之重大臣以兩極陳義請建坤儀之尊謂王道之大所由興故人倫之始不可緩明揚德闕之懿簡在慈闈之公欽承溫詔之音俾正中宮之位載蠲吉日敷告大庭故侍衛親軍馬軍都虞候眉州防禦使贈太尉孟元孫女忠孝令門善慶奕世幽閑專靜藹聞和聲婉睦惠慈雅應柔則天作之合文定厥祥人謀協從龜告并吉是宜入聽內職輔宣外和式瞻禕翟之章上直軒龍之象嘉典大備並行今古之情文盛德有開增美國家之治理於戲惟恭儉為富貴之守惟憂勤為康樂之資如關雎之進賢則可以基風化之成如摶木之逮下則可以將福履之盛用乂乃濟匪初其難勉爾欽修以法三宮之端一相予顯祀

以崇七廟之清明垂光紫庭龍襲譽彤管可立為皇后

徐王改封冀王制

范

祖禹

周尊公旦倚為四輔之師漢重王蒼位處三公之上及我仁祖加禮荆王顧惟冲人敢後叔父誕敷明命播告治廷皇叔永興鳳翔等軍節度管內觀察處置等使守太尉開府儀同三司雍州牧兼鳳翔牧上柱國徐王賜詔書不名顯稟訓英皇同氣神考仁義根于天性孝友冠于人倫昔在先朝蚤膺異數迨宣后九年之政無愛子一毫之私追惟崇慶之功罔極昊天

之報方畢太宮之祔饗莫先尊屬之喪嘉是用登拜師壇仍聯使節徹彼徐土受茲冀方內獎皇家外綏侯服進陪多賦衍食真封於戲並建親賢實為社稷之衛益彊藩屏用承祖考之休往膺典冊之光永介壽祺之祉式昭令德無愧前人

除向宗良檢校司空充醴泉觀使昭信軍節度

使制

曾

肇

昔周盛世則有申伯之良翰在漢懿親則有少君之長者眷吾神舅蚤著賢稱登進寵名誕敷詔號醴泉觀使奉國軍節度明州管內觀察處置等使持節明州諸軍事明州刺史上護軍河內郡開國公向宗良席慶深厚秉德粹溫富貴無自滿之心恭孝有夙成之質肆朕承桃之始首膺授鉞之榮茲屬東朝亟還大政念崇德報功之誼將錫異恩守右賢左戚之規莫回慈旨換節頌江之地參華空土之名增衍戶租併申朕志於戲維我太母有勞皇家方其艱虞則出任社稷之重及底康靖則還就宮闈之安動靜必惟其時進退靡失其正而猶

隆觀前載深於外親爾其念長樂之好謙思文簡之垂
裕益堅素履永保令名

除皇弟似守太保依前開府儀同三司蔡王充

保平鎮安等軍節度使制 曾 肇

朕惟本朝之制厚公族之恩列第京師不忍使之去國
兼榮將相未嘗責以治民豈惟致勳敘之仁抑亦隆
夾輔之勢矧吾寵弟實位真王念方屬於妙齡將即安
於外邸雖云密邇能不疚懷肆舉徽章用孚衆聽皇弟
武昌武成等軍節度鄂州滑州管内觀察處置等使守
司徒開府儀同三司持節都督鄂州滑州諸軍事鄂州
滑州刺史上柱國蔡王似出神明之胄鍾稌祝之祥氣
稟溫良生知遜悌雅愛圖書之習夙堅忠孝之誠桐葉
疏封已侈盤維之寄棣華致好每彰和樂之私比遵

朝著之趨尚與宮隅之邃屢觀啓奏祈避禁嚴志雖莫
回情實未忍思在宗之誼豈忘原隰之哀顧開府以時
難廢國家之典廼消穀日增峻官儀更兩鎮之節旄正
三師之位敘兼陪并賦益壯宗藩於戲周誥孟侯則曰
無康好逸漢詔諸子亦云無邇宵人蓋位不期驕者人
情之常寵至益戒者前哲所尚往服休命永綏令名

除曾布右僕射制 曾 肇

左右置相以摠吾喉舌之司東西分臺以幹我鈞衡之
任居中如鼎足之時承上若台符之聯相須而成關一
不可廼登次輔以告大廷左光祿大夫知樞密院事上
柱國魯郡開國公曾布敏識造微懿文貫道器周小大
之用智適古今之宜被 神考特達之知亟躋禁從膺
先朝倚注之重久執事樞而能悉心公家宣力夙夜忠

以迪上誼不辭難憂勤百為壯老一節肆朕纂臨之始
尤嘉翼戴之勞參稽師言圖任舊德文昌端揆之列紫
微陪侍之班合茲寵名作我近弼仍遷階品增衍戶封
於戲朕有休息百姓之心汝則覲文而匿武朕有綜覈
庶工之志汝則務實而去華以至甄序材良（彰）獎正
直澄清風俗振肅紀綱使萬物各得其平無一夫或失
其所汝之職也尚往欽哉

復元祐皇后制

蔡京

朕紹休烈聖承訓東朝施惠行仁既誕孚於有眾念
今追往用（彰）敘於我家廢后孟氏頃自勲門嬪于王
室得罪先帝退處道宮逮茲累年克庸祗德皇太后
念仙遊之浸邈撫前事以興悲惻然深矜示不終廢申
崇位叙還復宮庭乃詔輔臣具依審議雖元符建號已
位於中宮而永泰上賓無嫌於並后於戲原情起義
蓋示親親之恩克己慎身宜成婦婦之道其率循於懿
範以上荅於深仁往服茂恩永膺多福

蔡京降太子少保致仕制

張閣

政事所寄尤嚴誤國之誅人臣之姦莫重欺君之罪我
有常憲揚于大庭太師致仕楚國公蔡京頃以時才久
膺柄任兩冠台衡之峻三登公衮之崇庶圖爾庸以弼
予治而總秉機務出入八年事寢紊於將來謀悉違於
初議擅作威福妄興事功輕爵祿以示私恩濫錫予以
蠹邦用借助姻婭密布要途聚引兇邪合成死黨以至
假利民而決興化之水託祝聖以飾臨平之山豈曰懷
忠殆將徼福屢有告陳之迹每連狂悖之嫌雖僅上於
印章猶久留於里第偃蹇弗避傲睨罔悛致帝意之未

享昭星文而申譴言章繼上公議靡容固欲用恩難以
屈法宜禡師臣之秩俾參宮保之官聊慰羣情尚爲寬
典於戲天事尚象明罰所以弭災人道惡盈省躬所以
引咎往欽善貸無重後愆

皇朝文鑑卷第三十六

皇朝文鑑卷第三十七

誥

韓通贈中書令

劉



王贇授殿中侍御史

王

禹偁

登州黃縣尉東方辛可密州司士叅軍

歐陽脩

任守信可遙郡刺史依舊廊延路駐泊兵馬鈐

轄

歐陽脩

前杭州司理叅軍范衮可衛尉寺丞

歐陽脩

前知彰信軍節度判官褚式可太子中舍致仕

歐陽脩

虞部員外郎呂師簡可比部員外郎

歐陽脩

穎州推官江揖可大理寺丞

歐陽脩

進納人空名海詞

歐陽脩

著作佐郎張去惑可秘書丞

歐陽脩

永興軍節度推官董士廉可著作佐郎

歐陽脩

內殿崇班郝質可內殿承制

歐陽脩

開贇胡元並可內殿承制

歐陽脩

喬察可靜難軍節度推官知隴城縣

歐陽脩

試助教郭周可寧州軍事推官

歐陽脩

范仲温可台州黃巖縣尉

歐陽脩

史館書直官潘宗益可梓州司戶叅軍

歐陽 脩

內殿崇班李允恭可內殿承制

歐陽 脩

李仲昌可大理寺丞簽署渭州判官事

歐陽 脩

秦州興化縣主簿朱思道可衛尉寺丞

歐陽 脩

京西轉運按察使杜杞可直集賢院充廣西轉

運使

歐陽 脩

河北都轉運使張昱之充天章閣待制三司戶

部副使

張 方平

前秀州崇德縣尉左惟温可漣水軍錄事叅軍

文三十一

二

劉 敞

張鑄可光祿卿致仕

劉 敞

無為軍錄事叅軍馬易簡可太子中舍致仕

劉 敞

龍圖閣直學士兵部郎中涇原路經略使王素

劉 敞

太子中舍通判衡州張允可殿中丞

劉 敞

李育可著作佐郎許林宗可大理寺丞

劉 敞

皇姪右監門衛將軍克孝妻某氏可封仁和縣

君

劉 敞

西京左藏庫使忠州刺史高陽關路駐泊兵馬

鈴轄時明可文思使

劉 敬

宰臣富弼奏試國子四門助教王淵宰相韓琦奏鄉貢進士李常並可試將作監主簿

劉 敬

內殿崇班唐詢可內殿承制

劉 敬

定武軍節度推官衛觀可大理寺丞常州團練

推官沈披可衛尉寺丞

劉 敬

歐陽脩可禮部侍郎宋祁可尚書左丞范鎮可

吏部郎中王疇可右司郎中宋敏求可祠部

員外郎並依舊職任

劉 敬

叅知政事曾公亮可加正奉大夫進封開國公

劉 敬

將作監林洙可司農卿

劉 敬

權郴州軍事判官楊永可右贊善大夫致仕前

岳州平江縣張正已可大理寺丞致仕

劉 敬

韓通贈中書令

易姓受命王者所以徇至公臨難不苟人臣所以明大節周故天平軍節度使檢校太尉同中書門下平章事侍衛親軍馬步軍副都指揮使韓通定交霸府委質前朝荷戈共歷於艱貞錫壤迭分於戎律朕以三靈賡祐百姓樂推言念元勳方疇異渥蒼黃遇害良用撫然追升浴鳳之池式表潛龍之舊

王贇授殿中侍御史

王 禹偁

故事御史府三院轉遷各有月限考績之命異于他官國朝以來不用此制必因行慶方得叙遷其間才行有

聞爲衆所譽者不時而授人以爲榮具官王贄本以懿文輔之通識自登憲署繼領詔條潔已愛民所在稱理司漕運者奏其課執風憲者舉其才受代南康陞見與語宜從改秩用以勸能勉荷寵光勿渝素履

登州黃縣尉東方辛可密州司士參軍

歐陽 脩

朕以信示天下而以祿報有功今爾辛緣死事而命于官然按察者糾失職而來有請按察吾所詔也不從則不自信念功吾所急也不報則無所勸焉是用易爾散秩優爾俸祿免爾吏責俾爾自安庶幾使吾信賞並行而不失

西京左藏庫使內侍省內侍押班任守信可遙

郡刺史依舊鄜延路駐泊兵馬鈐轄

文三十一

四

歐陽 脩

國家自靈夏不賓邊隅多警議者率以謂用兵之道任將宜專恩信不久則無以得士心山川不習則不可圖勝筭自兵宿于野久而無功此殆將帥數易之患也苟有能者無遽奪焉以爾具官任守信選以敏材臨于戎事肅軍捍寇宣力有聞遽以飛章自言滿歲顧久親於矢石豈不念於勤勞然而士卒之樂旣汝安夷狄之情惟汝孰雖欲代汝實難其所宜旌以郡章仍臨舊部體茲委寄服我茂恩

前杭州司理叅軍范衮可衛尉寺丞

歐陽 脩

朕觀兩漢名臣多或出於丞史小吏非夫丞史之能出名臣也乃知古雖吏屬亦必選用賢材焉今中書丞相

之職比古公府曹掾之制吏負已為簡闕欲任其事豈不擇人故詔銓衡俾其慎選具官范袞有司來上以爾為材進爾諸丞往率乃職古人可慕無自怠焉

前知彰信軍節度判官褚式可太子中舍致仕

歐陽 脩

昨按察者言爾事有迹而爾方以老自請吾屈言者不究而進爾以秩全爾之歸吾之欲成人之美而不欲成人之惡如此汝其休矣知我之仁

虞部員外郎呂師簡可七部員外郎

歐陽 脩

國家嚮因寡兵特立賞格俾勸勤者速於集事而議者皆患應募之卒雖多而難用豈夫訓練之未至將由簡閱之不精然而號令重於已行賞罰貴乎存信今有司

按籍言爾當遷往服新恩其思實効

潁州推官江揖可大理寺丞 歐陽 脩

朕思與多士共寧庶邦而賢豪材美之人或自沉於幽遠與夫懿節茂行之韞于中而未見於事者吾皆不得而徧觀焉故以舉類之科而為官人之法今舉者言爾行可稱命爾新恩以期後效

進納人空名海詞 歐陽 脩

官者所以治人而非以假人之器也朕閱西人之勞而欲紓其乏有出其私以佐吾之用者是亦有益於吾民俾命于官所以示勸爾其往矣服我茂恩

著作佐郎張去惑可秘書丞 歐陽 脩

國家設官之法患乎巧偽干譽者之難止故考績之格三載而一例遷所以使沉實守正之人得以自進及其

弊也庸人希累日之賞而賢者不能自列故又增舊法
稍欲因舉類而求能者焉惟爾之材世所稱美夫累日
而遷非爾志干譽而進不可為惟思厥中務廣其業

永興軍節度推官董士廉可著作佐郎

歐陽 脩

自古苛偉之士因時立功而名在竹帛者率皆不以細
文常行責其備蓋於其大者人有所不能者焉惟爾少
而好奇不徇小節喜從兵事思奮其材今積久錄勞蓋
從請者若夫異賞待爾有為

內殿崇班亦質可內殿承制 歐陽 脩

夫被甲馳馬出而與敵周旋于原野塞旗斬馘歸而與
士卒數俘獲于軍中量功較計蒙褒被寵進而受賞于
朝廷此將帥之事也豈不榮且樂哉戰之功有小大國
之賞有重輕膺此茂恩更期後效

龍衛指揮使开寶拱聖指揮使胡元並可內殿

承制 歐陽 脩

朕之勁兵銳將戍于邊者不可勝數惟爾能以武勇出
乎其間方吾思得猛士之時吾之大臣以爾來上高爵
厚祿為爾等而設也往其勉矣吾將觀汝之能

秦州觀察支使喬察可靜難軍節度推官知隴

城縣 歐陽 脩

夫吏之不能稱職者或謂數易使之然今爾嘗佐於州
就臨屬縣其上下政令之便及土風民俗之所安皆所
習知可以為治將觀汝績無替其勤

試助教郭固可寧州軍事推官

歐陽 脩

自邊陲用兵而天下游談之士趨時蹈利者吾非不知其監而未始怠焉者冀必有得於其間惟爾之能乃其素學夫學有實者詰之不窮而推之可用嘉汝施設精而有條慮變適宜將觀汝用

范仲温可台州黃巖縣尉

歐陽 脩

爾弟仲淹參吾大政方欲輔朕平賞罰推至公以修紀綱而正庶位爾今所任有土與民惟過與功則有賞罰爾勤厥職可不戒哉

史館書直官潘宗益可梓州司戶叅軍

歐陽 脩

給事有年其勞可錄宜命以秩俾旌厥勤凡為有司惟久則習尚安乃職以謹克終

內殿崇班李允恭可內殿承制

歐陽 脩

朕惠州縣之吏不職者不能禦姦禁暴而憫吾民罹於賊盜故於捕盜之吏推賞尤厚非以為私蓋有為也今爾之請自陳其勞方吾以賞行勸之時惟恐不及故加爾寵非徇爾私夫古有讓功不言之賢惟爾宜慕

彰武軍節度推官李仲昌可大理寺丞簽署渭

州判官事

歐陽 脩

羣材之在下者思達其上難矣而在上者思得可用之材豈為易哉朕頃自擇能臣使舉其類而洙以爾充薦今琦又以為言琦洙皆能體吾勞於擇士之心者舉爾不應不愼需然推寵吾所不疑爾尚勉哉以稱茲舉

秦州興化縣主簿朱思道可衛尉寺丞

歐陽 脩

夫廉爲吏之一節也今保薦之法惟以受財爲同坐則待夫能吏豈盡其材爾其奮厥所長思有所立不獨守夫一節而已焉

京西轉運按察使虞部員外郎杜杞可刑部員外郎直集賢院充廣西轉運使

歐陽 脩

自一隅用兵而調發輸役之繁無遠不及況廣東西之路於東南尤爲遠者而吏多不良吾之疲民既有賦斂之勞而今又罹盜賊之患吾一慮及爲之惻然凡與吾憂國者豈遑暇於安居哉汝爲吾往其可憚勞吾又嘉汝名臣之後好學博文尚有榮名以爲汝寵凡吾寄汝之事繫汝之材吾惟責成爾可自勉

河北都轉運使工部郎中張鼎之可兵部郎中

充天章閣待制三司戶部副使

張 方平

唐自開元以還王室多故行在之所不能備官而從軍興之期顧多應卒之事爰從權便置諸使而天下庶政始不歸於尚書省今之會府乃在三司蓋自中臺至于寺監之務凡關出納無不總者故建其長以治要立其貳以治凡設其攷以治目以言乎三司之副是猶文昌之丞轄助上率下舉綱振日常出高選以贊大計具官張鼎之才識器用政事風采稱于朝廷著于方面今邊候多警戎車未脫凡物力之充屈繫生齒之耗登職司版圖必藉精力故謀于衆還爾外臺尚悉乃心以集五事

前秀州崇德縣尉左惟溫可漣水軍錄事參軍

天下無事人得養老長幼脩孝悌之行甚善而猾惡民起為盜賊奪攘以侵擾之郡縣所患者也汝以邑尉捕擊如律尚書條上闕閱遷爾紉曹祗服明命益思自奮太常少卿張鑄可光祿卿致仕

劉 敬

劉 敬

古者有司年至則致仕所以恭讓而不盡其力也具官張鑄履尚夷粹足以檢俗精力強敏足以濟物而能頌禮畏義願上印敕朕閔勞以官職之煩今聽其請夫佚老之士雖不輸力於朝其矯厲風節不亦過絕保祿持寵不知止者乎俾列九卿以榮其歸祗若休命思底終譽

無為軍錄事參軍馬易簡可太子中舍致仕

劉 敬

控搏祿利者至於遷籍損年飾貌匿衰以緩退休之期爾齒未耄仕無缺行能決於去庸非廉乎自下郡掾升東宮屬歸安鄉閭足為榮觀矣

龍圖閣直學士兵部郎中涇原路經略使王素可諫議大夫

劉 敬

朕臨御天下賴宗廟之靈方內乂安元元蒙福而往者戎狄窺間緣隙時入為暴患皆在守圉之臣文不能附眾武不足威敵使貪暴之民震驚朕師具官王素假節剖符居邊三年內鎮撫百姓外教戰士令行禁止惠于鰥寡爰及疆外羈縻之虜咸懷服集不失朝貢中國以安朝廷益尊此蕃衛之勲也詩不云乎大邦惟翰其議遷秩升于諫列以慰吏士出車東山之思

太子中舍通判衡州張允可殿中丞

劉 啟

郡有倅貳閔決眾務所以優民事示重慎也俗吏不察大體而矜勢怙權以爭重輕吏民反苦之甚非朝廷意爾居職自若奏課亦善通籍循省以疇歲勞方天之休其最哉

前邠州觀察推官李育可著作佐郎前趙州軍

事推官許林宗可大理寺丞 劉 啟

古之禮珪璋特達而璧琮有藉寶非不同也所從用之異豈唯寶哉士亦宜然育用文學進有以自見林宗繇吏材選稱於知己夫蓬丘圖書之府廷尉法理之本往為之屬各踐爾位思所以報毋隨而守

皇姪右監門衛將軍克孝妻某氏可封仁和縣

文三十七

十

君 劉 啟

常棣之詩其輯之亂曰宜爾家室樂爾妻孥知其為治內之本也今夫宗婦則有湯沐之邑封君之號此其所以稱宜且樂不亦光大章顯乎具官克孝妻某氏憑慶良輿作嬪懿近柔靜之操足儀閨壺莊肅之風能承祭禮俾疏列壤且擇令名尚無懈於夙夜思能對於休寵

西京左藏庫使忠州刺史高陽閔路駐泊兵馬

鈐轄時明可文思使 劉 啟

執干戈典兵馬之臣當以戰多勇功受賞於朝而但累歲月計資考以此取高位壯士之恥也然今天下又安士無所試其能故偏裨將帥例以恩進遷爾使列以觀來效爾亦毋謂易而得之因易而守之蓋亦竭節顧義

思所以報國者乎

宰相富弼奏試國子四門助教王淵宰相韓琦奏鄉貢進士李常並可試將作監主簿

劉 啟

曩者朕親祀清廟推恩延賞而大臣得薦其門下之士置之仕籍今丞相以常等聞夫與我陶冶萬物長育人材者非丞相欤何惜一命以慰士大夫之望其填所履毋辱已知

內殿崇班唐詢可內殿承制 劉 啟

邊吏欲其奉法守職以安吾民而不欲其邀功興事以撓王略也故歲滿無負者輒遷其秩爾有治狀協于賞格進承制命無隳常守

定武軍節度推官衛觀可大理寺丞常州團練

文監卅七

十一

推官沈披可衛尉寺丞 劉 啟

昔唐有天下諸侯自辟幕府之士唯其材能不問所從來而朝廷常收其俊偉以補王官之缺是以號稱得人今州郡從事皆吏部旨授然其試之臨政而不苟察之行己而有立亦皆一時之選已故吾亦且命以九卿之屬使漸而升於朝觀與披也既歷試於外又亟稱於知已得人之聲庶必能勉焉

翰林學士給事中知制誥歐陽脩可禮部侍郎端明殿學士吏部侍郎宋祁可尚書左丞禮部郎中知制誥范鎮可吏部郎中邢部郎中知制誥王疇可右司郎中三司度支判官太常博士集賢校理宋敏求可祠部員外郎並依舊職任

劉 啟

古之爲國者法後王爲其近於已制度文物可觀故也
唐有天下且三百年明君賢臣相與經營扶持之其盛
德顯功美政善謀固已多矣而史官非其人記述失序
使興壞成敗之迹晦而不章朕甚恨之故擇廷臣筆削
舊書勒成一家具官歐陽脩宋祁創立統紀裁成大體
具官范鎮王疇宋敏求網羅遺逸厥協異同凡十有七
年大典乃立閱富精覈度越諸子矣皆雖有功朕將據
古鑒今以立時治爲朕得法其勞不可忘也皆遷秩一
等布其書天下使學者咸觀焉

禮部侍郎參知政事曾公亮可加正奉大夫進
封開國公食邑五百戶賜雄忠佐理功臣

劉 敞

朕承七廟之光繼三聖之緒惟慎祀時享未足副盛德
委事有司未足盡誠孝故稽曠典歷吉日親率公卿躬
執豆蓬昭見祖宗並受祉福若乃褒時之對申錫無疆
天寓之內莫不受獲而況一二耄老肅雍顯相者乎具
官曾公亮德器渾厚智謨闕遠予欲觀于雅頌參元鳥
清廟之詩以追孝于前人汝明子欲謹于王事極四海
九州之美以備物于大饗汝圖子欲時和年豐以薦厥
嘉生登黍稷之馨汝翼子欲制禮協樂以對越太室交
神人之雍汝助夫賞國之典不可廢也進階中朝頒爵
上公衍食加田勒忠甲令使百執事粲然皆知輔德致
治之報焉不其偉歟

將作監林洙可司農卿 劉 敞

自周以來稷爲大官今吾非廢稷不務也而官益輕豈
居其職者未能勉乎具官林洙資稟通裕臨履脩潔擢

正卿位尚宜其事昔乃先正實領大農之任以迪文考
今年穀未充邊人望哺爾其勤身敏行無忝名實於以
勸稽劭民庶有賴焉濟爾世矣不其多乎

權郴州軍事判官楊永可右贊善大夫致仕前
岳州平江縣張正己可大理寺丞致仕

劉 啟

年至還政典也而貪祿者或不能止能止者皆好礼者
也至於以廉自嘉者有不待年去矣今永也禮而正己
也廉忽而不錄何以慰其子弟之心或升籍朝闈或承
事卿寺歸榮鄉閭以樂暮齒

皇朝文鑑卷第三十七

皇朝文鑑卷第三十八

誥

都官員外郎邢夢臣可侍御史殿中丞沈起可

監察御史裏行

劉 啟

兵部郎中張中庸可開封府判官

劉 啟

屯田員外郎胡揆除都官員外郎

劉 啟

度支郎中李碩可三司戶部判官

劉 啟

陝西路都轉運使兵部郎中天章閣待制傅求

可右諫議大夫河北都轉運使工部郎中天

章閣待制周沆可兵部郎中依舊

劉 啟

司門員外郎張鞏可開封府推官

劉 啟

曹穎叔充天章閣待制知福州

蔡 襄

張昱之可光祿卿致仕

蔡 襄

王元可右衛大將軍遙郡觀察使

胡 宿

皇姪岳州團練使英宗舊名起復泰州防禦使知宗

正寺

王 安石

起居舍人直秘閣同修起居注司馬光改天章

閣待制

王 安石

左司諫王陶可皇子伴讀

王 安石

范鎮加修撰

王

安石

高且可著作佐郎

王

安石

德妃沈氏姪孫猷卿可試大理評事

王

安石

沈德妃姪授監簿

王

安石

磨勘轉官

王

安石

王伯恭轉官

王

安石

甘昭吉入內副都知

王

安石

崔嶧刑部侍郎致仕

王

安石

皇兄故保康軍節度觀察留後承簡可贈彰化

軍節度使追封安定郡王

王

安石

參知政事歐陽脩曾祖某贈某官

王

安石

曾祖母某氏某國太夫人

王

安石

祖

王

安石

祖母

王

安石

父

王

安石

母

王

安石

樞密使張昇所生母

王

安石

三司使禮部侍郎田况可樞密副使

王

安石

屯田郎中詹率可都官郎中

王

安石

戶部副使太常少卿燕度可右諫議大夫知潭

州

鄭

安石

劔南節度推官張士澄等可大理寺丞

鄭

安石

皇姪右監門衛大將軍仲郃可依前右監門衛
大將軍黃州刺史特封齊安郡公

韓維

穎王府翊善守太常少卿直昭文館齊恢可守
尚書左司郎中依前直昭文館兼太子左諭
德諸王府記室叅軍尚書司封員外郎直集
賢院陳薦可工部郎中依前直集賢院兼太
子右諭德

韓維

西頭供奉官常用之可右清道率府率致仕右
侍禁李襄可率府副率致仕

韓維

台州寧海縣令魏昂可試大理評事充山南東
道節推知劍州劍浦縣

沈文通

內東頭供奉官庾浩然可內殿崇班

沈文通

都官郎中楊佐可司封郎中

沈文通

都官員外郎邢夢臣可侍御史殿中丞沈起
可監察御史裏行

劉敞

御史執憲轂下紀綱國體非雅亮勁正之士不足參論
議廣聰明拯與景初吾所信也使之慎東厥僚必皆其
人而拯也以起聞景初也以夢臣可稽之闕閱察之望
譽人咸曰允哉予甚嘉之夫鑑以明故可正容繩以直
故可形枉母勤小補而遺大體毋忽近務而墮常守事
君盡禮其可以報知己乎

兵部員外郎張中庸可開封府判官

劉敞

京師衆大之居其俗具五方而諸侯所視法也號稱難治蓋自古記之爲之尹者專用擊斷則網密俗敝崇之以寬則威信不立故常擇精明疏通之人以參其職具官張中庸持劇而用博行脩而志堅更煩決疑必有餘裕俾贊浩穰之政當適寬猛之中根本之地爾惟欽哉

屯田員外郎胡揆除都官員外郎

劉 敬

朝廷鎮撫四夷以綏中國貴於息民而不務佳兵故常申敕邊吏毋邀奇功五嶺已南蠻夷雜居其俗剽悍尤爲易動而桂州一都會也前通判軍州事尚書屯田員外郎胡揆承用詔旨悉心疆事終揆之任怙然無虞亦可謂善吏能宣明威信者矣夫守邊之患常在見小利而不達大體以侵迫驅奪之爲故至大亂貽憂吾民則

若揆者不可以不賞也稍增其秩以示褒寵

度支郎中李碩可三司戶部判官

劉 敬

財賦大計一出於民取之寡則用不足然而民逸取之多則用有餘然而民困此三司之難也術不能通輕重智不能調盈虛則吾不以爲人僚具官李碩嘗以名字典郡風采奉使敏以爲政精於檢下所到而治有迹可紀使之參計耗登贊舉策庶可以不傷財不害民乎往即會府母乏乃事

陝西路都轉運使兵部郎中天章閣待制傅求

可右諫議大夫河北都轉運使工部郎中天

章閣待制周沆可兵部郎中依舊

劉 敬

岐畢吾西土也。被山帶河，百二之險，而有昆夷之虞，燕
亳吾北土也。平原廣牧，四戰之地，而有獫狁之警，贍足
兵食，綱領郡縣，將命宣指，甚難其人。具官傅求，明智敏
察，表以文雅。具官周沆，深中篤厚，居以名檢，並委節傳
分按州郡，皆有述職之勤，美俗之風。夫較考陟明，其來
尚矣。或正諫省之列，或遷夏卿之屬，所以褒善勸能，爾
其欽哉。

司門員外郎張鞏可開封府推官

劉 敞

京師者舉衆大之辭，名之者也。風俗雜而獄市繁，治稱
浩穰，吾令襄爲尹，急吏緩民，甚有文理。其僚虛席，思得
敏才以左右之。具官張鞏，嘗使行河決，川滌源衆，工胥
作輓漕，以通其精力，幹用效在已。試俾贊輦轂之政，尚
克有立。夫都邑翼翼，四方是則。無習苟且，違道干譽，則
予一人汝嘉。

曹穎叔充天章閣待制知福州

蔡 襄

朕念善爲維持之策者，運天下如臂，使指欲其人。小相
臨而威令必達，故也。東南之郡，長樂都會，表山環海，地
險而遠，八州生衆，繫乎總帥。非有幹明之資，能辦吾事
者，不可以遣。具官曹穎叔，智力精敏，應幾必決，荐更器
任，籍有聲稱。將漕益部，還貳計省，而猥繁之務，罔不給
肅。今屬以方面之重，寵以延閣之華，爾其繕除兵械，補
完城堞，懷綏困窮，剪遏兇猾，使吾人無愁苦之嘆，朝家
有剗倚之賴。朕志唯是爾，儀圖之。

張暵之可光祿卿致仕

蔡 襄

朕於羣臣進退之際曷嘗不緬然思之方其強仕發智能以濟務則有官賞以楙其材逮其謝歸養志意以自佚則有恩渥以寵其行仕官者豈不雍然得其所耶具官張昱之立節清峻無緇磷之苟臨事明敏有批導之利恤民以惠屏奸以嚴循吏之風聞于當世自升禁近之列屢委宣藩之重服老聃之言而知止躡踈廣之迹而告老爾其還上官事秩以列卿休于而家尚體朕意

王元可右衛大將軍遙郡觀察使

胡宿

閹制之師蓋威於不若巖除之衛乃備於非常唯中外之迭更在倚毗之兼厚具官王元可資沉敏節尚剛嚴少厲武鋒博通軍志幹方授任政屢服於藩方厭難折衝功實施於邊境眷言雍部控于西州委以牙爪之師屯乃襟喉之地苛慝不作部分有嚴閱牘奏之爰來敘足腓之微苦願寘環衛乞朝京師須藥石之有瘳雖金革而無避忠言可壯誠實不誣朕以拱扈之嚴當資於宿將察廉之任用寄於舊勳遙揔十連聯司二衛式表疏恩之數且伸從欲之仁惟忠力之是圖亦威名之斯賴體茲優遇更竭乃誠

皇姪右衛大將軍岳州團練使英宗舊名可起復舊

官泰州防禦使知宗正寺王安石

先王糾合宗族而分職以治之所以嚴宗廟也宗廟嚴則禮俗成而天下治其事豈可以輕哉今朕選於近屬以脩宗正之官亦先王治親之意也以爾具官英宗舊名惠仁孝恭忠信純篤故遷厥位以稱禦侮之實而使任事焉夫士之欲施於政未有不學而能者學所以脩身也

身脩則無不治矣朕言維服爾往懋哉

起居舍人直秘閣同修起居注司馬光改天章

閣待制

王

安石

楊雄曰周之士也貴秦之士也賤周之士也肆秦之士也拘蓋言先王以禮讓為國士之有為有守得伸其志而在上不敢以勢加焉朕率是道以君多士以爾具官司馬光文學行義有稱于時故明試以言使司告命而乃固執辭讓至于八九改序厥職以伸爾志是亦高選往其懋哉

左司諫王陶可皇子伴讀

王

安石

自天子至於士未有不待學而成者今朕欲進諸子於學求可與居者而大臣以爾為言爾久在諫垣有聞於世茲惟慎選可不勉哉

范鎮加修撰

王

安石

昔周人藏上古之書以為大訓而孔子春秋天子之事也蓋夫討論一代之善惡而撰次之以法度之章非夫通儒達才有識足以知先王不欺足以信後世則孰能託尚書春秋之義勒成大典而稱吾屬任之指乎以既具官范鎮有該通之材有純潔之操辯論深博溢於文辭論思禁林時議惟允則夫按善惡見聞之實斷是非去取之疑人之所難宜以命爾爾其精思熟考自勉以古之良史而毋襲近世以事屬辭之失使無以考焉

高旦可著作佐郎

王

安石

唐虞以三考黜陟幽明而其所命或終身於一職然則其所謂陟者蓋爵服之加而已今之增位猶古之加爵服也以爾久於職事而功用應於有司之法故使增位

以報焉。雖所更之歲月與黜陟之法古今不同，而吾所以褒厲庶工，非與唐虞異意。爾其母息，思稱厥官。

德妃沈氏姪孫獻卿可試大理評事

王 安石

朕於后妃之家，不欲以恩撓法。法之所當得者，義亦無所愛焉。爾方眇然，未克有知，而以外戚之恩，得試理卿之屬。時乃邦制，不為爾私勉哉。有成，以待官使。

沈德妃姪授監簿

王 安石

京官吾所重也。故設磨勘之法，以待吏部之所選。非有勞而無罪，及有任舉之官，則不可以得之。爾由外戚，以孩幼入官，得吾之所重。其強勉學問，求為成人，以稱吾待爾之意。

磨勘轉官

王 安石

有司考爾等之閑閑，而揚爾等於朝廷。朕親覽焉，皆應遷法。夫命官賦祿之事，朕非輕之也。維以章有德，序有功。名在審官，則三歲而一遷，亦維以閑夫職事之勞，而勉之盡力。爾等勿謂名器之可計，日以自取也。而無報上之意焉。

王伯恭轉官

王 安石

方今仕於朝廷者，率三歲而一遷。論者患其不足以勸功。然日月久矣，能祇慎不怠，免於罪悔，則亦宜有以褒嘉。此朕所以使爾得遷之意也。士之為義，蓋有常心，何必利焉。然後知勸。

甘昭吉入內副都知

王 安石

古者王之正內，必有任職之臣。予若稽古，而思得吉士以充其選。以爾服勤左右，多歷歲年，有專良之稱，無側

媚之毀其使序于正內以允廷論之公焉爾其審門闥
謹房闈入宣宮令出贊朝事悉心夙夜一以忠信則維
予爾嘉爾亦永綏寵祿

崔嶧刑部侍郎致仕

王

安石

仕焉而告老者自一命以上必有以慰其歸況吾邇臣
恩紀所厚宜增位序以示褒優以爾具官崔嶧比以明
揚久於煩使入參侍從出備藩維踐更滋多寄屬惟允
引年辭位得禮之宜進貳秋卿以榮居息古之士者非
苟自佚其身唯慎行祗法以助成王德爾所知也往其
懋哉

皇兄故保康軍節度觀察留後承簡可贈彭化

軍節度使追封安定郡王

王

安石

樂其生而哀其死欲其富貴之無窮仁人於親戚莫不

文選卷三十八

然而王者得盡其褒崇之意具官承簡於宗室為近屬
於朝廷為大官有溫恭恪慎之稱無驕嫚逸欲之過不
幸至於窳窳用震悼于朕心義兼親賢恩禮當稱今夫
建牙樹纛節制一軍而封爵至於稱王人臣之極也朕
其追命以賜焉尚其有知享此休顯

叅知政事歐陽脩曾祖某贈某官

王

安石

君子善善之義下及子孫况推而上之至其祖考所以
褒美崇寵顧豈可以不稱哉故先王宗廟之制視其爵
祿位之高下以為世數之遠近而本朝追命之禮亦
從其子孫名數之卑尊具官歐陽脩曾祖潛于丘園躬
有善行畜積之慶施于曾孫為時宗工名重天下圖什
以登于右府褒嘉當及其前人東宮之孤位已顯矣進

秩一品尚其享哉

曾祖母某氏某國太夫人

王

安石

尊之欲其貴親之欲其富豈特人主有是心哉推是心以施於人此人主所以與天下同憂樂之意也祿有厚薄故禮有隆殺位有高下故施有遠近古之道也其可忘哉具官歐陽脩曾祖母含德在躬作嬪令族積善之慶覃其後昆惟時聞孫實朕良弼登豫政事人無間言其疏大邦之對封以報流澤之施寵維靈之極尚克享哉

祖

王

安石

為吾政事之臣所以崇寵之者備矣於是尊大前人之志亦宜有以稱焉具官歐陽脩祖某積行在躬潛而不耀畜其善慶以賴後昆厥有聞孫為朕良弼典司機要海內所瞻追命之榮至于帝傳進登師位以極褒嘉尚

其真靈膺此休顯

祖母

王

安石

朕疏郡縣以君諸臣之母欲以稱慈孫孝子之心至於政事之臣則封圖及其王母所以望其功者厚矣則慰其心者顧可以薄哉具官歐陽脩祖母來嬪名家克配君子積善之福覃于其孫左右朕躬豫國政事嘉而有後錫以大邦維靈在幽尚克膺此

父

王

安石

大臣得爵命其先人至乎公師非古也然禮者人情而已矣當於人情而義足以勸士則何必古之有哉具官歐陽脩父某畜其德善不顯於世克生賢佐為朕股肱東宮一品人臣高位追以命汝用嘉有子尚其享此以稱餽祀之盛哉

母

王

安石

古者子爲諸侯大夫而父爲士則其祭以諸侯大夫之禮朕以謂得享其禮而位號不稱則不足以盡孝子之心故今有列於朝廷皆得追崇其考妣又況於爲吾左右輔弼之臣哉具官歐陽脩母嚴稱於天下能教其子爲時名臣協于詢謀進斷國論雖祿養不及而饋享有加啓封大邦於禮爲稱尚其幽窆知享此榮

樞密使張昇所生母

王

安石

傳稱春秋之義母以子貴說者或非焉而人子之愛其親豈有窮哉已則富貴而親不與焉固人情之甚可哀者也當有追崇之禮稱其思慕之心具官張昇所生母溫柔惠和得媿君子克生賢佐爲朕寶臣允于庶言秉國樞要追崇之典旣啓爾邦其改新封以鴻後慶尚其宜漢享此恩榮

三司使禮部侍郎田況可樞密副使

王

珪

天文三階中躔紫極之輔國事二柄右列鴻樞之司維君臣之謨明有夙夜之基命朕當登進時傑贊襄七猷以導萬微之中以合九德之會匪至公之進曷羣聽之歸以爾具官田況器懷閎深業履端厚材適國家表裏之體學貫天人精祲之交而自高賢冊於大廷儀峻遊於清路西垣名命之粹內閣論思之勤擁帥節于邊而天聲憺於殊俗筦財柄于內而國用豐於歷年茲庸倚爾忠力之良置諸宥弼之地熙我大業垂之亡窮噫本天下之兵莫重安危之寄在常右之陟有若臣鄰之榮蓋德懋者寵所隆任大者責亦至勉思盡瘁永克

承休

屯田郎中詹庠可都官郎中 王 珪

世治俗厚賢能衆多其高材異行則待以越次之位而守職奉法亦褒累日之賞非有厚薄理則然也爾服于朝著陳力事任有司稽年書闕應陟其增一秩以慰夙夜浚明之勤往服休命勿忘祗飭

戶部副使太常少卿燕度可右諫議大夫知渾

州 鄭 儼

湖湘之南溪蠻剽悍而易擾法而馴之則亦弭伏望其失御遂出而嚙邊其禍亦不細得無肅又廉治之帥為之良牧者哉以尔具官燕度醇明忠厚通於世務更在要劇芒刃愈出俾副大農厥功茂焉宜加賜諫議大夫魚符犀節往甸南服內以惠斯民外以柔殊俗朕方端袞面朝以遲爾之奏課矣

劍南節度推官張士澄等可大理寺丞

鄭 儼

萬官之才豈朕一耳一目之可盡之哉然而卒所以能盡之者寄朕之耳目於嶽牧連帥推而進之耳維汝脩方宿業以廉治自顯薦牘交上可勿聽乎宜寵以廷尉丞以示我擇材之公

皇姪右監門衛大將軍仲郃可依前右監門衛大將軍黃州刺史特封齊安郡公

韓 維

朕按屬籍以觀祖宗之世而陳王之後獨微顧其位不章顯朕甚憫之以爾具官仲郃孝友博謹善守法度爰命褒錄以鴻厥慶刺史重任也郡公高爵也遙領紹

建茲謂顯休噫惟務學可以正己惟率禮可以保位汝其懋哉

穎王府翊善守太常少卿直昭文館齊恢可守尚書左司郎中依前直昭文館兼太子左諭德諸王府記室參軍尚書司封員外郎直集賢院陳薦可工部郎中依前直集賢院兼太子右諭

德

鄭

獬

唐制左右諭德掌諭太子以道德其內外庶政有可為規諷者隨事而贊論焉則處其官者其選可以不重哉以爾恢清謹廉正不失其常以爾薦質直和厚可任以事而或入道經訓或贊為書記使王有聞繫爾能力屬儲闈之肇啓擇郎曹而並進夫語道者非序而安取論德者惟行之為艱母或易言以墜予訓

西頭供奉官常用之可右循道率府率致仕右侍禁李襲可率府副率致仕

鄭

獬

古之仕者量其可任則受至于不能而止所以遠始辱也朕嘉斯人之徒故於謝事而歸者必增秩以遣之往欽茂恩以安末路

台州寧海縣令魏昂可試大理評事充山南東道節推知劍州劍浦縣

沈

文通

前日天下令長多非其心人始詔刺舉牧守之臣察廉為之故遠近之縣十七八治朕甚嘉之汝其選也汝既三歲被代而知者尚鮮何哉雖然不可不少褒也其升職幙府復為百里益有以薦于朝者當命汝遷焉

內東頭供奉官廖浩然可內殿崇班

沈 文通

禁闈小臣衆矣非以德舉而材選也特以給左右之役
導內外之事而已故未嘗輕命以遷所以異乎吾外廷
士大夫之典也今爾考不幸乃有遺封以爾爲請朕念
爾考事我之久位于通顯汝亦謹信無咎故進汝之秩
班于殿朝以爲汝寵朕於汝父子可謂至矣其思所以
報我者焉

都官郎中楊佐可司封郎中

沈 文通

水之爲利害也甚矣堯舜其猶病諸故歷代建以爲官
莫之能廢而朕用稽焉惟爾佐學行材智廉正膚敏實
吾士大夫之望而自領都水出入累歲夙夜盡瘁具有
厥功朕甚嘉之故因有司大比之叙陟爾左曹之正以
爲朕寵其往宿爾業愈獻厥成則亦當有以稱爾矣欽
哉

皇朝文鑑卷第三十八



